

Textfeller


Nu geiht dat wieder mit unsen Uthang. As neegst kümmt de Liste vun de Saken, de to verschenken sünd. Dat is en Wedderhalen för Se, dat öövt. Maakt Se sik de Liste mit schöne Listenteken trecht!

Intoog un Tabstopp

Giff't Probleme? Is de Smiley so groot, dat he över den Tabstopp rutragt? Dat schull nich ween. De Tabstopp un de hangen Intoog schulln en good Stück rechterhand vun't Listenteken stahn. Dat köönt Se op twee Weeg ännern – kriggt Se dat noch alleen hen?




- Entweder Se treckt de Saak in't Lineaal trecht – dat köönt Se ja.
- Orr Se gaht den Weg över **Format | Nummerierung und Aufzählungszeichen**, Knoop **Anpassen**. Nerrn in dat Fenster köönt Se nämli de Afstänn regeln.
- In de Vorschau **A** seht Se, wat de Reegn unregelmäßig anfängt.
- Wenn ja, denn rückt Se in'n Beriek **C** Tabstopp un Intoog mehr na rechterhand. De twee schulln jümmers an desülvige Steed stahn – Se weet ja, woso.
- In de Liste **B** köönt Se ok noch den Erstreegnintoog, also de Posischoon vun den Smiley, verännern. So köönt Se ok de ganze Optelln na rechts orr links rücken – das allens köönt Se sik avers ok in't Lineaal tosamenpuzzeln.



Sorgt Se nun dafür, dat de Optelln de Reeg good utfüllt – geekt Se den Text orrig Schriftgrött! Wenn nödig, rückt Se de ganze Optelln beten na rechterhand. Wenn de Afsätt sik to dicht op de Pell sitt, geekt Se ehr beten Abstand **Vor:** orr **Nach:** in **Format | Absatz**. Denn maakt Se sik poor lerrige Reegn ünner de ganze Optelln un geekt denn de ganze Optelln en gemeinsamen Rahmen. Treckt Se beten an den Rahmen, dat he wieder na buten kümmt.

Op den Rahmen sett wi to'n Spaaß noch en ClipArt, dat wi natürlich **Vor den Text** leggt. Hier is dat de Wiehnachtsmann; wenn he jüst nich past: Dat giff't ok en Oosterhaas!




So süht dat betherto ut. Nu kaamt de Telefonnummern nern. Se staht lootrecht. Wa hett Mina Muster dat nu wedder anstellt?!

Textfeller


Dat geiht mit noch en Aart grafisches Objekt, nämli mit dat Textfeld.

- Klickt Se op Menü **Einfügen | Textfeld**.




- Word maakt nu en Reesenzirkus: Dat denkt, Se wüllt en Teknen erstellen, un maakt dorför Vörkehren. Ignoreert Se dat einfach! (Bi öllere Word-Verschoonen wartt Se dormit sowiso verschoont, dat is eerst siet Word XP so.)
- Wichtig is nu, dat Se en niegen Muuswieser hebbt: en Fademkrüz +.

- Treckt Se mit düt Fademkrüüz en Rechteck op, 'neem Se dat hebben wüllt – buten vun Word sin Teknen-Rahmen! De verswinnt denn.
- Se seht, dat Rechteck is en grafisches Objekt, dat automaatsch **Vor den Text** legt is (witte Anfaters!). Binnen blinkt de Schrievmarke. De winzige Symboollist **Textfeld** lungert jichenswo op den Billschirm rümmer.
- Schrifft Se „Kinder-Sportspielzeug zu verschenken“ un de Telefonnummer.



- Nu schall de Text lootrecht. Gaht Se in Menü **Format | Absatzrichtung**. Düsse Befehl is bloots in Tabellen un Textfelder to bruken!
- Wählt Se en lootrechte Textrichtung!
- Passt Se de Grött an. – So wied, so good!



Wat sünd Textfelder?

Nu hebbt wi dor en Textfeld. Dat is so en intressantes Objekt, dat wi dat nauer ünnersöken wüllt. Blangenbi is dat ja ok noch nich ganz trecht.

En Textfeld is en Zwitter twüschen Text un Grafik, en (meist) komplettes lüttes Textdokument, dat frie as Objekt verschaven wann kann!


WordArts sünd ok en Methode, Text in ein grafisches Objekt to verwanneln, avers Textfelder sünd anners. Hier warrt de Text nich verwannelt, sünnern bloots in dat Objekt rinschaven; de Text blifft Text. Dat kann so veel Text ween, as Se wüllt! Ok en lüttes Textfeld kann grenzenlos veel Text opnehmen.

Allens Theorie? Nee. Dat is jümmers good to weten, wat achter en Saak steken deit. Een kann denn veel beter mit ehr ümgahn – een versteiht, **worüm** se so funkscheneert.


Steiht de Schrievmarke in't Textfeld? Good. Denn kiekt Se sik mal dat Lineaal an. De helle Beriek, 'neem in schreven wann kann, is nu bloots so groot as dat Textfeld. Un dat giffit extra Intoogsmarken binn in düssen Beriek! Dat wiest us: Dat Textfeld is en egen lütt Textdokument, mit Lineaalberiek, Intöög un allens – bloots lierlütt.



Wenn de Text al lottrecht steiht, kiekt Se mal op de Format-Symboollist! Alle Utrichtenssymbooln hebbt dat spitzkregen un hebbt sik jüst so dreht! Putzig, nich?



Dat sünd Egenschapen vun en Textdokument. De Text is in't Binnere vun't Textfeld. Liekers is dat Textfeld ok en grafisches Objekt. För de Grafik-Egenschapen is de Rand vun dat Textfeld tostännig. Se köönt dat Textfeld an de Anfaters grötter un lütter maken, un Se köönt dat ok verschuven! Dorto mööt Se op den Rand wiesen, un twoors twüschen de Anfaters. De Muuswieser warrt hier – un bloots hier! – to'n veerfachen Piel. Nu köönt Se trecken.



So funscheneert Textfeller

As Zwitter mutt dat Textfeld Text- un Grafikegenschapen beden. Dat maakt dat so:

- Wenn Se in't Textfeld sülvten arbeiten doot, also in'n Text, is de Rand vun't Textfeld striept. De Muuswieser is över den Text en Strich, as sik dat bi Text höört.
- Wenn Se dat Textfeld as Grafik markeern wüllt, klickt Se op den Rand. Denn warrt de Rand punkt't. Dat ganze Textfeld mit Inhold is denn markeert.

In't Textfeld arbeiten

- Wiest Se op den Textberiek vun't Textfeldes. De Muuswieser is en Strich.
- Klickt Se rin. De Schrievmarke blinkt, un de Rand vun't Textfeld is striept.
- Formateert Se de Afsätt zentreert (also lootrecht zentreert) un süss na Ehrn Smack.
- Se köönt in't Textfeld ok markeern, kopeern un infögen, ok Rahmen setten, sogoor Biller infögen, wenn Se wüllt – as in en Textdokument even.





Dat Textfeld as Ganzes

- Nu treckt Se sik dat Textfeld op de passen Grött trecht.
- Is de Rand punkt't? Wenn nich, klickt Se eenmal op den Rand.
- Nu kopeert Se sik dat Textfeld. (**Kopieren**-Symbol op de Symboollist, Tastengriep **Strg+C** orr Kontextmenü!)



- Klickt Se eenmal buten vun't Textfeld, dat den sin Markeern weg is.
- Nu föögt Se mehrmalen in (**Einfügen**-Symbol op de Symboollist, Tastengriep **Strg+V** orr Kontextmenü!). Klickt Se dorbi jewielen buten vun't Textfeld, dat keen Textfeld markeert is, wenn Se inföögt.
- Woso denn jümmers buten klicken? Na, süss warrt dat Textfeld in't Textfeld inföögt – dat süht vermurkst ut, orr Word maakt dat eerst gor nich un bringt en Fehlermellen as dü.






Nu köönt Se de Textfeller an'n neddern Rand vun't Dokment anoordnen. Wenn dat to wenige sünd, köönt Se noch welk dortokopeern, sünd welk överflödig, denn löscht Se ehr einfach.

Textfeld löschen

- Dat ganze Textfeld markeern,
- **Entf**-Tast drücken!

De Uthang is binah trecht! Noch hebbt uns Textfeller en Rand; de schall weg.



Textfeld formateern

- Klickt Se jichenswo in en Textfeld – Rand orr Text is dütmaal egaal.
- Gaht Se in Menü **Format**, letzte Befehl. He heet nu **Format | Textfeld**. Den Dialog kennt Se ja!
- Bi **Farben und Linien**, Beriek **Linie**, stellt Se einfach **Keine Linie** in.
- Se köönt dat Textfeld ok mit en Fülleffekt utfülln! Probeert Se't!

Alle Textfeller tohoop

Dat weer natüürlich dösing vun us, de Rahmenlinie nich **vör** dat Kopeern wegtomaken, nich? Man maakt nix. Wi mööt dat nu nich teihnmaal maken – wi maakt dat för alle restlichen Textfeller tohoop!

- Markeert Se dat eerste Textfeld (op den Rand klicken, Veefachpiel!).
- Hollt Se de **Ümschalt**-Tast daldrückt. Dat is de Tast för Grootbookstaven.
- Markeert Se alle annern Textfeller liekso. Dorma köönt Se de **Ümschalt**-Tast loslaten.
- Formateert Se nu alle Textfeller op een Slag!

Dat gemeensame Markeern op düsse Wies geht mit alle grafischen Objekte!

